

吳門張路玉先生纂述千金方衍義嗣出

張氏醫函通

同德堂梓行

序

夫人身猶天地也天地失和

則宇宙爲殃人身失和則四

體爲病所以主之者在天地

惟君在人身惟心故心爲君

主君失其治則宇宙災因心
失其養則四體疾疢其災
困惟相之調和燮理治疾
亦惟醫之調和燮理故曰不
爲良相卽爲良醫然相失政

則殘民醫誤治則殘命相之
與醫豈易言哉蓋天地之九
州人身爲九竅天地之九野
人身爲九藏又石爲之骨土
爲之肉江河爲血液草木爲

毫髮道路爲脈絡風爲氣雨
爲汗雷爲聲凡此則人身無
不合於天地者天地有災莫
不載聞道路人身有疾莫不
見諸脈絡故治疾猶要於測

脈也予當治邑江城署多奇
疾邁識張路玉先生其察脈
辨證輔虛祛實應如鼓桴因
問之曰人身脈絡衆多取病
何獨決兩腕云兩寸爲心肺

之關隘一身之所主猶君相

之都邑天下之總會故天下

災無不肇於都邑一身病無

不形於兩腕也人之六脈猶

廷之六部天下刑賞與罰莫

不由此然其昂藏磊落風論
卓絕迴越常識其能運天時
於指掌決生死於須臾又非
泛泛可及知無經天緯地之
才者不可與言醫也以之爲

良相又誰曰不可後以脈學

一書索序曰診宗三昧子雖

不知醫觀其論天地陰陽之

常變山川草木之脈理靈機

獨發無不貫通造化予所云



爲良相信然時因取召赴都
碌碌未遑諾就今於職務瘁
勞嗽疾復生思良醫不可得

因述數語郵寄以誌仰云

康熙己巳卽墨通家弟郭琇

譔



醫通序

醫何昉乎古之聖人如神農黃帝首先
創制爲功萬世下逮三代秦漢唐宋金
元莫不代有名醫照耀紀載周禮一書
周公所以治天下者無一事之不備至
於醫師特令上士爲之不輕命人以是
知百家技藝皆聖人之所創立民生之

不可一日無者而醫尤甚其參贊化育之功幾欲中分吾儒之權蓋本以精於藝而因以達於德所謂由委而溯源也昔孔子有味南人之言而嘆醫之不可無恆也夫此心惺惺常存無時不然無時不恆矣雖然雷風天下之至變聖人以之象恆者何故蓋萬古此雷風卽萬

古此恒觀恒者自萬古觀非自一日觀
聖人之久於道也豈其膠固而靡所變
通哉神而化之使民宜之此聖人之恒
也噫知此斯知醫矣丹溪不云乎古方
新病安有能相值者泥是且殺人余謂
醫之有譜其失則均假令劉張李朱同
處一堂之上其論不能皆合其方不無

小異要其有濟於人則一也家昆路王
氏崑之望族故明廉憲少峯公之孫光
祿烈愍公嫡姪賦性磊落不事章句勵
志岐黃遂擅一時六十年來專心性命
之學不可謂之無恒矣歷年博採古人
方論汰粗存精斂繁歸約不忍獨秘梓
而行之將以教天下者教萬世焉世之

師心者讀是書可以不煩思索而坐得其標本緩急之理世之拘方者讀是書且將樂乎其新忘乎其故漸漬其中而不自覺也豈不爲有功於後學與昔應劭采典藝以正風俗之非今家昆體經論以正通俗之異非謂道在是而通俗可正也言久於其道而天下化成也醫

之道在乎達權通變變通之象恒顯見
於雷風吾故以是昉之通之之義得無
有取於是耶

康熙癸酉端午後三日晉江弟汝瑚拜
書

